



RECOMENDACIÓN DIRIXIDA AO SR. ALCALDE-PRESIDENTE DO CONCELLO DE CERVO (LUGO), PARA QUE DEA RESPONSA ÁS SOLICITUDES DOS VECIÑOS E APLIQUE OS RECURSOS PREVISTOS NA LEXISLACIÓN DE TRANSPARENCIA.

Expediente: T.1.Q/2112/18

Santiago de Compostela, 4 de maio de 2018

Sr alcalde:

Nesta institución iniciouse expediente de queixa como consecuencia do escrito de D. [REDACTED], como representante do partido político *Compromiso por Galicia*, referente a unha avaría na piscina municipal, sobre a que solicitaba unha serie de datos.

ANTECEDENTES

No seu escrito, esencialmente, indícanos que solicitara, o 15 de febreiro de 2018, no concello, información sobre a orixe da avaría ocorrida na piscina municipal o día 8 de febreiro e que continuaba sen solventarse. Queríase coñecer cal fora a causa da avaría, en que consistira e a data de volta ao servizo. A presentación da queixa estaba acompañada de dous escritos, presentados en papel timbrado do comité executivo local de *Compromiso por Galicia*, ambos con número de rexistro de entrada no concello e ambos cunha solicitude de información.

Ante iso requirimos informe a ese concello, que xa nola remitiu. Coa información aportada se subministra a resposta ao Valedor do Pobo, pero non consta que a persoa que instou a queixa a recibira.

A resposta consiste en indicar que “Na pía municipal de Lieiro, con data 8 de xaneiro de 2018, houbo un corte do subministro do condensado, por parte da factoría de Alcoa, o que provocou unha perda de temperatura e aproveitouse a situación para realizar labores de mantemento, concretamente o selado parcial do rebosadoiro perimetral do vaso da pía do circuíto de recirculación interna dende a lámina de auga ata o vaso de compensación.

Con data 18 de xaneiro de 2018 procedeuse á apertura e posta en funcionamento da pía novamente.

Posteriormente con data 11 de febreiro de 2018, produciuse unha avaría na pía consistente na rotura da válvula de purga de filtración con perda de volume da auga do vaso (1.000.000 L), o que provocou o peche da pía.

Atendendo a esta situación seguiuase co selado total de todo o rebosadoiro e á recuperación do volume de auga perdido co seu tratamento de depuración e desinfección.

A pía entrou novamente en funcionamento o día 2 de marzo de 2018, coa celebración do Campionato Galego de natación Junior.”

ANÁLISE

Á vista do contido do escrito de queixa, da documentación achegada pola persoa que promoveu este expediente e do que se manifesta no informe da administración, cómpre facer as seguintes consideracións:

Os escritos dirixidos ao concello con datas de 15 de febreiro e 5 de marzo de 2018 fan unha solicitude de información.

O artigo 13 da Lei 39/2015, do 1 de outubro de procedemento administrativo común das administracións públicas establece que as persoas nas súas relacións coas administracións públicas teñen dereito ao acceso á información pública, arquivos e rexistros, de acordo co previsto na Lei 19/2013, do 9 de decembro, de transparencia, acceso á información pública e bo goberno e o resto do ordenamento xurídico.

A Lei 19/2013, do 9 de decembro define a información pública como contidos ou documentos, calquera que sexa o seu formato ou soporte, que obren en poder desa administración local e que fosen elaborados ou adquiridos no exercicio das súas funcións (artigo 13). Esta lei, igualmente, establece, no artigo 20, que o sentido do silencio transcorrido o prazo máximo para resolver é desestimatorio.

A Lei 39/2015, do 1 de outubro, mantén a obriga de ditar resolución expresa en todo caso, e se ben, é certo que os interesados poden interpoñer os recursos administrativos ou contenciosos que procedan, non é menos certo que esta situación lles causa un prexuízo pecuniario directo no caso de que a única vía sexa a contenciosa administrativa, e en calquera caso supón un límite aos seus dereitos que é difícil de xustificar dende a protección do interese público que corresponde ás administracións públicas.

CONCLUSIÓN

Por todo o sinalado ata agora considerase necesario, en aplicación do disposto no artigo 32.1 da Lei 6/1984, do 5 de xuño, do Valedor do Pobo, facer chegar a ese concello de Cervo a seguinte recomendación e recordatorio de deberes legais:

A resposta que a esta petición concreta tense dirixido a esta institución, e tódalas peticións e solicitudes da cidadanía que afecten ao dereito de acceso á información pública, teñen que tramitarse de conformidade co disposto na Lei 19/2013, de 9 de decembro, de transparencia, acceso á información pública e bo goberno, do 9 de decembro, correspondendo, por tanto ao concello darlle a resposta directa á persoa que se dirixe a ese concello en busca de información.

Agradézolle de antemán a acollida ao manifestado nesta resolución do Valedor do Pobo, e recórdolle a necesidade de que no prazo dun mes (art. 32.2), dea conta a esta Institución da aceptación da recomendación formulada, de ser o caso, e das medidas adoptadas para darlle efectividade, tamén se é o caso.

Ademais, facémoslle saber que, en aplicación do principio de transparencia, a partir da semana seguinte á data na que se ditou a presente resolución, esta incluírase na páxina web da institución.

Debo lembrarlle tamén que, ao abeiro da lei reguladora desta institución, o seu artigo 33 prevé que, se formuladas as súas recomendacións, non obtivese resposta ou, nun prazo razoable, non se producise unha medida adecuada ao suxerido, o Valedor do Pobo poderá poñer os antecedentes do escrito e as recomendacións efectuadas en coñecemento do conselleiro do departamento afectado ou da máxima autoridade da Administración Pública galega.

Se tampouco obtivese unha xustificación adecuada, incluírá tal asunto no seu informe anual ou especial, con mención dos nomes das autoridades ou funcionarios que persistan naquela actitude, especialmente nos casos en que, considerando o Valedor do Pobo que era posible unha solución positiva, esta non se conseguise.

O principio de publicidade das resolucións desta institución refórzase no artigo 37 da Lei 6/1984, cando prevé que o Valedor do Pobo, no seu informe anual ao Parlamento de Galicia, dará conta do número e tipos de queixa presentadas; daquelas que foron rexeitadas e as súas causas, así como das que foron obxecto de investigación e o seu resultado, con especificación das suxestións ou recomendacións admitidas pola administración pública galega.

Agradecéndolle a súa colaboración, reciba un atento saúdo.

Milagros María Otero Parga
Valedora do Pobo